

Kukagua Uhalisia



SABATO MCHANA

Somo la Juma Hili: *Ufu. 3:14–22; Ufu. 4:9–11; Mwa. 2:7; Mwa. 3:8–10; Yer. 31:3, 4; Yohana 15:1–11; Rum. 8:9–11.*

Fungu la Kukariri: “Kama vile Baba alivyonipenda mimi, nami nilivyowapenda ninyi, kaeni katika pendo langu” (*Yohana 15:9*).

Unaweza kuelezeaje uhusiano wako na Mungu leo? Je, ni imara na angavu? Unatumia muda katika kuwekeza kwenye uhusiano huu, ukichunguza Neno Lake lililovuviwa, na kunena naye kama Rafiki? Kama ni hivyo, unatumia muda kiasi gani katika kufanya hilo?

Vilevile, je, unajisikia kusukumwa kuwaambia wengine kuhusu uhusiano wako na Mungu kwa sababu huo ndiyo uhusiano bora zaidi maishani mwako? Au, badala yake, je, uhusiano wako na Mungu umepungua baada ya muda? Upo, ndiyo, na unaingia mara kwa mara, lakini kwa kweli, si imara tena kama ulivyokuwa. Au, pengine, uko mahali fulani katikati, kile Biblia inachokiita “vuguvugu” (*Ufu. 3:16*).

Je, umewahi kujiuliza kama malaika hutafakari kwa nini hatuishi katika kumwabudu Mwokozi na Mkombozi wetu, kwa mioyo yenye njaa na akili zenye shauku ya kukua karibu na Mungu kila siku? Kwa sababu kwa kweli, uhusiano na Mungu hubadilisha kila kitu—hapa na hata milele.

Juma hili, hebu tutafakari hali ya sasa ya uhusiano wetu na Mungu na jinsi ushauri wa Biblia ulivyo kwetu. Hakika, hatuwezi kuhama kutoka tulipo hadi mahali pengine pazuri zaidi hadi tujikague kwa uaminifu na kusikiliza ufumbuzi ambao Yesu anauelezea.

**Jifunze somo la juma hili kwa maandalizi ya Sabato ya Aprili 4.*

Hali Yetu

Je, umewahi kujiuliza Yesu angesema nini kama angeelezea uhusiano wako Naye sasa hivi? Pengine angesema ni imara, au kwamba umekuwa imara zaidi huko nyuma. Je, umewahi kujiuliza Yesu angesema nini akielezea juu ya watu Wake katika siku hizi za mwisho? Katika Ufunuo 3:14–22, Yesu kwa hakika anaelezea.

Anaanza kwa kusema kwamba Yeye ni ““Shahidi aliye mwaminifu na wa kweli, mwanzo wa kumba kwa Mungu”” (Ufu. 3:14). Shahidi mwaminifu na wa kweli hasemi uongo bali husema wazi na kwa uaminifu.

Soma Ufunuo 3:14–17, ambapo Yesu anaelezea hali ya kiroho ya watu Wake leo. Je, maandiko haya yanakuelezea wewe binafsi kwa usahihi kiasi gani?

Bwana Yesu anatuambia, Wakristo katika siku za mwisho, kwamba anatumia. Sisi si moto au baridi, kwa sababu, kutokana na mtazamo wetu, hatuhitaji chochote. Siku na majuma hupita, na tunatumia muda kidogo na Mungu hapa na pale, na tunafikiri hiyo inatosha. Lakini siyo. Badala yake, kwa kweli tunamhitaji sana kuliko tunavyotambua. Laiti tungeweza kumpenda na kuishi kwa ajili ya Yesu kwa moyo wote au la kabisa. Hiyo ingekuwa bora kutokana na mtazamo wa Mungu kuliko kuwa vuguvugu. Yesu anasema kwamba atatutapika kutoka kinywani Mwake kwa sababu tuna ladha mbaya kama tulivyo. Lakini bado hajafanya hivi, na anatuomba tufanye maamuzi ya ujasiri sasa hivi.

Ushauri Wake kwetu ni upi kwenye Ufunuo 3:18, 19?

Katika nyakati za kale, “kununua” kitu kulimaanisha kubadilishana au kubadilishana bidhaa. Hapa, Yesu anakaribisha zoezi la kubadilishana: hali yetu ya kutojali kubadilishana na dhahabu Yake, na mavazi Yake meupe, na dawa Yake ya macho. Anataka kutufanya matajiri machoni Pake; Anataka kutufunika vazi Lake kamilifu la haki; na anataka kufungua macho yetu kuona ukweli wa jinsi uhusiano wa kudumu pamoja Naye utakavyobadilisha kila kitu kabisa. Anatupatia yote tunayohitaji, hasa kwa sababu kile tunachohitaji, hatuwezi kujipatia wenyewe. Yeye peke Yake anaweza na atafanya, lakini ikiwa tu tuna nia.

Ikiwa unaumia kujitazama mwenyewe na hali yako ya kiroho, ni tumaini gani unalopewa katika aya hizi za leo?

Kemea, Tubu na Thawabu

“Wote niwapendao mimi nawakemea, na kuwarudi,” Yesu anatuambia kwenye Ufunuo 3:19. “Basi uwe na bidii, ukatubu.”

Hakuna hata mmoja kati yetu, hata kwa sekunde moja, angeweza kusema kwa usahihi kwamba Bwana Yesu hatujali wala hajali mustakabali wetu. Ingekuwa rahisi zaidi kiasi gani kwa Yesu kuachilia ubinadamu na asiipitie njia ya maumivu aliyoichagua hapa duniani. Ni kwa usahihi kabisa kwamba anatupenda kwa upendo wenye kina sana kiasi cha kutukemea kutokana na hali yetu ya sasa. Yeye anataka kuwa na uhusiano imara zaidi, wenye kina zaidi na sisi. Yeye haridhishwi na mitazamo yetu inayoyumba, mitazamo yetu ya “Nitamjia Yeye pale nitakapomhitaji.”

Badala yake, Yesu anatokemea kwa manufaa yetu. Yeye anatuambia tutubu. Lakini hatuwezi kutubu tusipotambua kwamba kuna jambo ambalo haliko sawa. Licha ya hivyo, ametuambia kwa umahsusi kabisa kosa letu: tunadhani kuwa tu matajiri, lakini kwa kweli sisi ni yule aliye “mnyonge, na mwenye mashaka, na maskini, na kipofu, na uchi” (Ufu. 3:17).

Soma Ufunuo 3:20. Tumeahidiwa nini hapa? Lakini tufanye nini ili tupate kupokea ahadi hiyo?

Hii ni lugha nzuri sana yenye kuweka taswira isiyo ya kawaida. Mungu wa ulimwengu anataka kuketi chakulani pamoja nawe, pamoja nami. Anatamani ushiriki wa pamoja na mazungumzo katika chakula kizuri. Haya ni maelezo ya uhusiano wa karibu, wa kudumu, na Bwana Yesu anatalika tuwe na uzoefu huu pamoja Naye.

Yesu anasimama kwa subira akingoja na kubisha hodi kwenye mlango wa moyo wako. Pengine umeona picha za mwonekano huu katika vitabu vya watoto-Mwokozi mrefu, mwenye neema, akigonga kwa upole. Yeye hakuingilii na kukulazimisha kuzungumza Naye. Yeye hakuvamii katika wakati wako au maisha yako yenye shughuli nyingi. Muda ni mfupi, kwa hiyo, ukimsikia, fungua mlango. Atakuwepo ili kuingia maishani mwako.

Sitiri hii inaonesha namna ya uhusiano ambao Yesu anataka uwepo kati Yake na kila mmoja wetu. Lakini siku moja, utakapokutana na Yesu ana kwa ana, utakapoiweka chini taji yako miguuni pake ukimsujudia na kumsifu pamoja na maelfu kwa maelfu wengine katika ibada kwa Muumba (Ufu. 4:9-11; Ufu. 5:11-14), utakapojaribu kutupa mawazo yako nyuma kwenye majaribu ya kidunia na kuona kwamba yanapotea na kuonekana kuwa hafifu kiasi cha kukosa maana – unadhani wakati huo utajuta hata kidogo kwamba ulitumia muda uliokuwa nao na Yesu hapa duniani?

Sasa hivi, Yesu anabisha. Yeye anakuita. Hata hivyo, wewe, inakupasa kufanya uchaguzi wa kudhamiria kufungua moyo wako Kwake. Kuutazama msalaba na kufikiria kuhusu kile unachomaanisha kunakutiaje moyo katika kufanya uchaguzi huo?

Upendo wa Milele

Baada ya kuonesha hali yetu ya kutojali, Yesu anatuambia kwamba hili ni jambo ambalo yapasa kulishinda. “Yeye ashindaye nitampa kuketi pamoja nami katika kiti changu cha enzi, kama mimi nilivyoshinda nikaketi pamoja na Baba yangu katika kiti chake cha enzi” (*Ufu. 3:21*). Kwa baadhi yetu, inaweza kuwa vita kuu zaidi ambayo tumewahi kukumbana nayo—kwa kutambua tu hali yetu dhaifu, ya kujitoshesheza; kukubali kemeo la Yesu; kutubu; na kupokea vazi la Yesu la haki juu yetu kwa macho ambayo yanaona hakika.

Kinachoshangaza sana ni kwamba Yesu anaelewa hali yetu ya kutojali, ya uvuguvugu na anajihusianisha nasi (si kwamba Yesu aliwahi kuwa vuguvugu wakati wowote). Anasema, “Kwake yeye ashindaye . . . kama mimi nilivyoshinda” (*Ufu. 3:21*). Kwa sababu Yesu alikufa ili kutuokoa, ameshinda dhambi na adhabu yake. Yeye anaelewa vita vya dhambi ambavyo tunakabiliana navyo na anaahidi kutusaidia.

Watu wengi kwenye Biblia waliitikia mwaliko wa Mungu wa kuwa kwenye uhusiano wa agano pamoja na Yeye. Hizi ndizo simulizi au mada kuu ya Biblia nzima. Tunapowatazama baadhi ya watu hawa, tunaweza kuona kwamba Mungu alishirikiana nao kwa njia tofauti kwa nyakati tofauti.

Simulizi hizi zinatufundisha nini kuhusu jinsi Mungu anavyoshughulika na watu katika hali mbalimbali?

Mwa. 2:7, Mwa. 3:8–10 _____

Mwa. 5:24 _____

Mwa. 6:13 _____

Mwa. 12:1–4 _____

Kut. 34:29 _____

Iwe Mungu alitembea kimwili au uhalisi na watoto Wake au kama Alizungumza nao tu, ukweli ni kwamba daima Ametamani kuwa karibu na wanadamu. Haidhuru uhusiano wako na Mungu uwe vipi leo, Mungu anataka kuwa karibu nawe. Tunaweza kusoma kuhusu wazo hili katika Yeremia 31:3, 4 hapa chini:

“BWANA alinitokea zamani, akisema, Naam, nimekupenda kwa upendo wa milele; kwa hiyo nimekuyuta kwa fadhili zangu; mara ya pili nitakujenga, nawe utajengwa.”

Iwe siku yako inaanza au inaisha sasa hivi, Mungu anakutafuta na kukusubiri, akitaka kukusogeza karibu naye. Anataka kujenga—au kujenga upya—uhusiano wako Naye. Kama hilo halitokei, kosa liko upande wako, si Wake.

Ni mambo gani maishani mwako wakati huu, ambayo, usipoyashinda, yanaweza na huwa yanazuia uhusiano wako na Mungu?

Kaa

Wanafunzi walimfuata Yesu chini ya ngazi nyembamba kutoka chumba cha juu hadi barabara iliyo chini. Walipokuwa wakitembea pamoja hadi Gethsemane, katika ule uliokuwa usiku wa maana sana katika historia ya dunia, pengine hawakutambua jinsi baadhi ya maneno ya mwisho ya Yesu kwao katika Chumba cha Juu yalivyokuwa yenye kutia uchungu kweli.

Yesu alisema nini katika Yohana 15:1-11?

Maneno haya, yaliyosemwa na Yesu Mwenyewe, yanaelezea jinsi uhusiano wa karibu na Mungu ulivyo. Angalia neno linalorudiwa, si mara mbili tu bali mara 10: kaa. Kukaa ndani ya Yesu ni kuishi katika uhusiano Naye.

Anapoukabili Msalaba, Yesu si tu kwamba anasisitiza umuhimu mkubwa wa kukaa huku ndani Yake, lakini Anasema kwa uwazi na kwa urahisi kipengele cha uhalisi wa jinsi inavyoonekana maishani mwetu.

Ambayo ni: Yesu ni mzabibu, sisi ni matawi. Kama matokeo ya kukaa (kuunganishwa) Naye, matunda yatakua kwenye matawi yetu. Sisi wenyewe hatuwezi kufanya matunda yakue. Wakati mwingine tunaweza kuonekana kana kwamba tunadumu, lakini ushahidi utakuwa katika ukosefu wetu wa matunda, na hatimaye matawi yetu yatakauka. Ikiwa tumekauka, Mkulima wa Mizabibu hatimaye atakata matawi. Bila kujali tunazaa matunda au la, matawi yetu yatapogolewa.

Wakati huo huo, sisi sote tunakabiliana na changamoto na nyakati zenye maumivu. Tukikaa ndani Yake, nyakati hizi zitazaa matunda zaidi kwa muda mrefu. Kuzaa matunda kunathibitisha sisi ni nani (wanafunzi). Tunazaa matunda ili kumletea utukufu (si kwetu wenyewe). Kukaa ndani ya Yesu kunamaanisha kushika amri Zake, ambazo ni onesho la tabia Yake nzuri ya upendo usio na ubinafsi. Kukaa ndani ya Yesu huleta furaha kuu. Kukaa ndani ya Yesu kunamaanisha kufanya kile anachotuomba, kama mwenyezi Kwake. "Kwa maana huku ndiko kumpenda Mungu, kwamba tuzishike amri zake; wala amri zake si nzito" (1 Yohana 5:3).

Ukifikiria juu ya hilo, kukaa ndani ya Yesu ni mojawapo ya dawa za hali yetu ya Laodikia (Ufu. 3:20, Yn. 15:4). Ni siri kuu ya maisha yaliyotimizwa na yenye maana duniani na hadi umilele, lakini kwa njia fulani tunasahau kwa urahisi ushauri wa Yesu.

Hatimaye, Yesu anamwambia kila mmoja wetu, "Kama vile Baba alivyonipenda mimi, nami nilivyowapenda ninyi, kaeni katika pendo langu" (Yohana 15:9). Upendo wa Yesu ndiyo kamba yenye nguvu zaidi inayotuvuta Kwake, na tunapojua upendo huo, tutachochewa sana kuitikia kwa upendo kwa Mungu na kwa wengine.

Utomvu

Kukaa ndani ya Kristo wakati mwingine kunaweza kuonekana kama moja ya mambo magumu zaidi kufanya. Tunaweza kujua kwamba hiki ndicho tunachohitaji, lakini hekaheka za maisha hutuvuta kwenye mkondo wake, na kisha inaonekana kuwa vigumu sana. Kumfuata Mungu kunaweza kuonekana kuwa mzigo mkubwa zaidi kuwahi kutokea, hasa kwa wale wanaoudhiwa na mtu anayejaribu kuwafanya wamfuate Yesu. Dini ya aina hii inaweza kuonekana kuwa ya kuchosha kwa sababu yote huwa inahusu matendo ya nje badala ya yale yaliyo moyoni. Hakuna kinachoweza kuwa mbali zaidi ya kile ambacho Mungu anatamani, ambao ni uhusiano ambao msingi wake ni upendo wa pande zote, si sheria tu; uhusiano uliochaguliwa (ambamo Yeye alikuchagua wewe kwanza) kulingana na upendo na uchaguzi wa bure.

Wakati mwingine tunaweza kuwa tumeunganishwa kwa kiasi fulani na Mzabibu lakini hatujakaa kweli kwa kila nyuzi za utu wetu. Tunaweza kwenda kanisani, kuomba na kufanya kile tunachojua ni sawa, lakini ndani tunahisi kudhoofika. Ukweli ni huu: Hatuwezi kujiweka wenyewe ndani ya Yesu kama vile tawi lisivyoweza kujiunganisha lenyewe na mzabibu. Mungu alitupenda sisi kwanza; Alifanya hatua ya kwanza. Mwitiko wetu daima ni mwitikio kwa kile ambacho Mungu ametufanyia kwanza.

Ikiwa unatazama jinsi mzabibu unavyoishi wakati wa majira ya baridi, utajifunza ukweli wa kuvutia - machipukizi kwenye matawi hupungukiwa na maji na kutengwa na mfumo wa kukua hadi majira ya kuchipua. Wakati udongo unapopata joto, mizizi hufyonza maji, na utomvu hupanda kupitia shina la mzabibu hadi kwenye machipukizi na kisha huanzisha ukuaji. Bila utomvu unaotiririka kupitia katika mzabibu, hakuna ukuaji utakaotokea.

Utomvu katika mzabibu ni kama Roho Mtakatifu maishani mwetu. Tunaweza kuwa kama tawi lililokufa, lakini tunapochagua kutumia muda pamoja na Mungu, Roho Mtakatifu humiminika ndani yetu kama utomvu kutoka kwenye mizizi na kutuleta kwenye uzima ili tuanze kukua. Vilevile tunahitaji kufanya uamuzi wa kutaka kukaa ndani ya Yesu, ni lazima pia tuombe Roho Mtakatifu (utomvu) atiririkie maishani mwetu.

Soma Luka 11:13 pamoja na Yeremia 31:3; 1 Yohana 4:19 na Warumi 8:9-11. Kuna ujumbe gani hapa ulio muhimu kwetu?

Kwa kweli ni Roho Mtakatifu anayeleta ukuaji na kuhakikisha kwamba tunastawi na kushikamana na Mzabibu. Tunahitajika kila siku kwa ajili ya Roho Mtakatifu, ambaye yuko pamoja nasi hapa duniani ili:

- Awe Msaidizi wetu (*Yohana 14:16-18*).
- Amfunue Yesu kwetu (*Yohana 15:26*).
- Atusadikishe kuhusu dhambi (*Yohana 16:7, 8*).
- Utuongoze katika kweli yote (*Yohana 16:13*).

Soma orodha hii tena. Ni kwa jinsi gani kila kipengele cha kile anachofanya Roho Mtakatifu kinaweza kuathiri uhusiano wako na Mungu?

Jifunze Zaidi: Kabla hatujazaliwa, Mungu alitupenda; Alipanga kutujua na sisi tumjue Yeye. Anatutafuta, kama Mchungaji mwema, na anatualika kukaa ndani Yake kila siku. Tunahitaji tu kuchagua kumwitikia Yeye, na kisha kubadilisha unyonge wetu na hali yetu ya u - Laodikia kwa zawadi zake nzuri (*taz. Ufu. 3:18, 19*).

Kama ulivyo ukuaji wa polepole na matawi ya mzabibu, uhusiano wetu na Mungu unaweza kukua polepole, au unaweza kulipuka na kufurika kutokana na mvua tunayohitaji sana. Bila kujali kasi tunayokua nayo na wingi wa matunda yanayozalishwa katika maisha yetu, tunahitaji "utomvu" wa kila siku, au Roho Mtakatifu, ili kuhakikisha kwamba tunabaki tukishikamana na Yesu.

"'Kaeni ndani yangu, nami ndani yenu.' Kukaa ndani yake Kristo kunamaanisha kudumu kumpokea Roho wake Mtakatifu. Maisha ya kujisalimisha kindakindaki katika huduma Yake. Njia ya mawasiliano ni lazima iwe wazi kila mara kati ya mwanadamu na Mungu wake. Kama matawi ya mzabibu ni lazima sisi tushikamane na Yesu na kupokea nguvu na tabia yake kamilifu kwa imani." – Ellen G. White, *Tumaini la Vizazi Vyote*, Sehemu ya Pili, uk. 290.

"Mche mkavu uliokatwa unawezaje kuwa mmoja na shina la mzabibu kuu? Unawezaje kufanywa kuwa sehemu ya maisha na ustawi wa mzabibu ulio hai? Ni kwa kupandikizwa tu ndani ya mzabibu, kwa kuletwa kwenye uhusiano wa karibu zaidi iwezekanavyo. Nyuzi kwa nyuzi, mshipa kwa mshipa, tawi hushikilia sana mzabibu unaotoa uhai hadi uhai wa mzabibu, kama tawi hilo likiwa na tawi." – Ellen G. White, *Manuscript 67*, 1897.

Maswali ya Kujadili:

- 1 Tafakari juu ya maisha yako. Je, unaweza kutambua matukio yoyote ya maisha ambayo yamekuingiza katika hali ya kiroho ya Laodikia? Ni matukio gani ambayo yamekuleta karibu zaidi na Mungu?
- 2 Ellen G. White anazungumza kuhusu "kupokea Roho Wake mara kwa mara." Je, ni mara ngapi unaomba kwa ajili ya Roho Mtakatifu? Ni nini kinaweza kubadilika ikiwa unapokea Roho Mtakatifu kila siku?
- 3 Ni nini kinachoweza kubadilika ikiwa sisi, kama kanisa, tungeomba kwa ajili ya Roho Mtakatifu kwa bidii zaidi na mara kwa mara zaidi?
- 4 Uwe mkweli kwako mwenyewe bila kujihurumia, hata kwa uchungu juu ya uhusiano wako na Mungu. Je, ni chaguo gani makini unalohitaji kufanya ili kuwa na ukaribu Naye anaotaka lakini unazuia?

Muhtasari: Kabla ya kuanza kukua katika uhusiano na Mungu, inatubidi kwanza kutulia ili kufikiria uhusiano wetu wa sasa na Yeye ulivyo. Ikiwa ni Laodikia au ikiwa matawi yetu hayastawi, Yesu ana suluhisho kamili kwa hali yetu ya kiroho: kukaa ndani Yake.